

AN·SENGATTALANI

KA·SROKATTALANI

IN·SAOATTALANI

TANGPILATTALANI

D.D.




**AN·SENGATTAIANI**

**KA·SROKATTAIANI**

**AN·SAOATTAIANI**

**TANGPILATTAIANI**

**F. W. Harding, D.D.**



**No.28 - 1000 - 10-8-42**



AN·SENGATTAIANI, KA·SROKATTAIANI,  
AN·SAOATTAIANI, TANGPILATTAIANI.

---

Bilsi chikungna skang Turao Dr. Phillips sagini bungalow kamatako man·aha. Uni somoio lechu bol pangsako kamchapaha. Cheksirang baksa bitongba wa·alchi nisiatako man·aha. Ua bol mamung saloba ritimjawa, biteko pangnaba nangtaijawa gita nikachim. Uni chongipa bolchongdikko supee galsrangenba, ua biapo a·ako bake apsanatode nitobatnikgenchim ine chanchiaha. Indiba memsahib chanchiaha, ua bol sisranga gita nikoba, chataiani cholko una on·ode nama. Uni gimin uko supegija tangpiltaiiani cholko on·skaaha.

Ru·utgijan ua bolchongdikoni cheksirang chabataie, bijak ritimtaie, manchoktaie bibal baltaie, bon·kamao bite nangtaie ja·mano uko ake ua sigiminoni lechu biteko chinga cha·taiaha. Uandake ua salintal bilsiantio cha·taitaiaha.

Ian toani. Maiba mondoliko ua lechu bol sigipa baksa tosusana ama. Sisrangaha gita ua mondoli ong·a. Ua bol gita a·ako gimaaba gimaatarienga, uko supegenode nambatsusu nika. Indiba Isol an·ching gita nikja aro chanchija. Ua mondolio Ua saniba saniba ka·tongrango toromko ching·taiatna walkiko nika. Ua Isolni Songnokna ka·pakgipa chongipa dolo Isol ka·dongenba ua mondoliko spoe toromni wa·alko ching·attaina ama. Ia A·chik songni

mondolirangni itihasko name sandiode basikba chang indake ong·baaha.

Anga gisik ra·enga maikai angni ia A·chik songona re·bachenganio maibajolo mofossil wenmitingo, saksa bebegipa Kristian budepani noko romitingo, ua angko sepanggipa a·dingni kosakona re·dilaha. Unoni niwate ua jol gimikko nikna man·a. Unikoa ua budepa ua biap damsani ja·mano biap damgipinrangko jaksi ote angna mesokate aganaha, skango ua biaprango Jisu Kristoni askirang teng·suengachim indiba da·o ua jolo donggipa kristianrang Isoloni an·pile ua chakkirang siangtokaha. Da·o ua jolrangni andalaniara bebera·na skang andalanina bate batenga ine ua grape agandapaha. Ua jolrangni andalaniara uni ka·tongo bal jrimbegipa ong·achim - - indita jrimgipa ong·a maikai uni nokogiparangmung ua an·tangan salprakprako Isolo mol·molchakaha maikai ua andalsimsimo Isolni chakkirang ching·piltaie teng·sutaigen.

Ru·utmano ua jolo Isolni chakkirang ching·taie teng·sutataiaha. Gilja ka·taina a·bachengaha, skulrangko dontaiaha. Beben sigimin tangpiltaiaha. Anga uko nikaha, aro Isolko mitelaha.

Pil·e, A·chik songo gittim damsa donga jeo saksa budepamung uni jikgipa uamang sakgnina agre pilakan Isolko watgalaha. Ua song changsa mondolini ma·mong ong·aha, indiba chu ringe, aping cha·e, namgijako dakroroange ua song seng·aoni an·pile andalachipak

mikkangchake tangangaha. Ia budepa chonbegipa gilja nokko rikaha. Robibaro ua kontako pangnan dokrongaha, indiba ua aro an·tangni jikgipana agre pilakba Isolko olakkina tom·bajachim. Re·bajaoba uamang sakgni nom·angjachim. Uamang sakgni bang·a bilsirangni gisepo indake robibarprakprako konta doke gilja noko tom·e Isolo bi·chakaha. Uamang Jisuni indine ku·rachake aganani chu·sokaniko uimangiparang ong·achim - - “Jeo sakgni sakgittam angni bimungo tom·a, uon Anga uamangni gisepo gnang” (Mati 18:20).

Uamang sakgniko Isol salgichi rimangaha, indioba uamang sina skang pilakba uamang baksa Isolko olakkina giljachi re·barongjachim. Uamang simanosa uamangni krengani, bimchipani, Isolko pangnan rasong chaatani, Isolo pangnan mol·molchakani bite nanganiko an·chinga nikaha. Ua songogiparang gisik pil·aha, uamang giljachi re·taiaha, uamang namgijaoni Isolona an·pilaha. Sigimin tangpiltaiaha. Anga an·tangan uko nikaha, aro Isolko mitelaha.

Sigimin mondoliko tangatpilna Isol tapprao donnugimin tangengpitigipa bebera·gipa wal·kiko Gisik Rongtalgipachi spoate tangpilata. Isolni dongspara Uni sakki on·gipa ong·a. Mondoliko an·saoataniara Isolni toromna okkrichongmot·giparangoni a·bachengna nanga. Bichal Isolninrangoni a·bachengna nangchenga. Isol Uni mondoliko rongtalat·chengon Ua indakgipa chongipa dolko an·saoatchenga. Ia chongipa jakko ia Isolni

**dongspako, maikai Isol name jakkalna man·gen uamang skang Isolni Gisikni rongtalataniko nangchenga; uamangni janggi tanganirangoni silki galatako man·na nanga, maikai uamang rongchingbegipa janerarang gita teng·sugiparang ong·bagen. Satanko chena ia dakgrikanio Isolna ka·sachongmotgiparang Isolo bi·anichi, paptangtangko ku·rachakanichi, an·tangtangko Isolna on·kanganichi chegen.**

**Ru·utana skang Asia Minorni Sardis songjinmao donggipa Kristian mondolini gimin Parapeao Johon indine seaha : “Nang·ni kamrangko, chong·motan na·a tangani bimungko man·aha, indiba na·a sia ine anga uia. Na·a mikrakbo, aro sinasigipa dongengsparangko mangrakatbo; maina anga nang·ni mamung kamrangkoba angni Isolni mikkango chu·sokatako man·jaha. Uni gimin na·a maikai man·aha aro knaaha uko gisik ra·bo; aro uko rakibo aro gisik pil·bo” (Parap. 3:1-5).**

**Uni a·bachengao Sardis mondoli namgipa bimchipgipa ong·achim, indiba ja·mano ua sigipa, bimung mangmangkosan man·gipa ong·baskaaha. Sardis songjinma dal·gipa ong·achim. Uni ning·o Jisu Kristo ua mondoliko chakki gita donaha, indiba ua chakki siangenggipa ong·bae teng·sujachim, uni seng·ara andalasa ong·baskaaha.**

**Jekai ru·utana skang Sardisogipa mondoli ong·baaha uandake da·ororoba gipin a·songrangogipa maiba mondolirang ong·baaha. Uamangni Isolni gimin sakki gri,**



uamang siangenggipa chakkini chadoenggipa wal·ku gita  
ong·aia. Uamango donggipa seng·a andala ong·baskaaha.  
Oe, indakgipa mondoli ge·sa ba ge·gni A·chik songo donga.  
Uamangni bimung donga indiba uamang tusienga ba  
siangenga. Uni memborrangni gisepo bang·bean Isolni  
suakpile on·a tom·toma aro katchapilaniko  
ka·tongtangtango uijaenga.

Indakgipa mondolio maiba donnugimin wal·ki  
dongengnaba donga jeko spoe tangatkuna man·naba  
donga. “Sinisigipa dongengsparangko mangrakatbo” ine  
mikrakata, maina ia dongengsparango je mondolikoba  
an·saopilataniara pangchaka. Ua dongspa dongode, ua  
mondolini gimin ka·dongani dongengpiti. Isol “be·gopgipa  
tuluko pe·jawa, aro tochrini kilding dimikako ua kimitjawa”  
(Mati 12:20).

Nang·ni uigimin mondolirangni gisepo, na·a  
indakgipako pangnaba nikkujachimma ? Nikbebemanaha  
ine aganchakna man·genkon. Ua mondolini tapprarango  
toromni wal·ki dongengkuode, ua mondoliko namatpilani  
aro an·saoatpilani chol donga ine ka·dongani gngang. Maikai  
indita ka·dongani chu·sokatako man·gen, Isolni suake on·a  
katchapilaniko, ning·tugipa tom·tomaniko, chakna  
ampilgijagipa nambea pattianiko man·aniona re·angpiltaina  
ramako ka·mao jaksi ote mesokenga.

(1) Mondolitangko an·sengpilataniara Kristonirango a·bachenggen. Uamangko rongtalatchenganio pangchaka. Uamangni dal·begipa dai nangani gnang. Mondoliko namatpilanio ong·chenggipa nanggniara Isolo ka·donggijanirango an·saoatani, uamangko Isol baksa nangrimatsrangani ong·a. Uamang rongtalatako man·manosa Isol uamangko mondoli gimikko an·sengatpilna jakkalgen. Ua mondolio uamangara Isolni gangbuatgnigipa wanti ong·a. Uamangara chonbegipa tangenggipa wal·misisan jechi Isol dal·gipa wa·alko ching·attaigen, mondoliko tangatpilgipaan.

Isolni nok chong·motko itrokchengna nanga, Uni ganchio dangdike on·giparangni jakrangko su·srangchengna nanga, indakgiparang skang rongtalataniko man·chengna nanga, uamang skang an·tangtangni pilak namgija dakanirango chel·atchengna nanga. Mondoliko dakdilgiparang an·tangtangan skang pilak namgijako dondikchengchina. Indake ong·baon, Isol mondoli gimikni kosako suakpile tona ampilgijagipa pattianirango rudapna man·gen. Unon mondoli an·saopilataniko man·e katchabee ka·sroke Isolni tom·tomako uigen.

Maikai indake ong·na man·gen, jerangan mondolitangko namatpilna sikbea, uamang sakprakprakan do·gako chipchange dongnuao, Isolni mikkango donge, Isol Pagipani Gisik uamangni ka·tongtangtangko sandie

nichina on·china. Uamang indine Isolo bi·china, “Angko niroke nibo, O Isol, aro angni ka·tongko uibo; Angko nie nibo aro angni chanchianirangko uibo; aro ango maiba namgija rama dongama dongja nibo, aro jringjrotni ramao angko dilangbo” (Git. 139:23,24).

“Nang·ni ka·sae daka gita angna ka·sachakbo, O Isol: Nang·ni ka·sachaka bang·bea gita angni niam pe·anirangko kimitbo. Angni namgijako talatsrange angko su·srangbo, aro angni papko watsrange angko rongtalatbo . . . Nibo, ning·ni bakrango na·a bebeko man·na ska, aro donnugimin bako na·a angko uianiko uiatgen . . . Angko su·srangbo, unon anga suurina bate bokbatgen. Ka·sroka aro katchaako angko knaatbo; . . . Angni paprangoni nang·ni mikkangko donnubo, aro angni pilak namgija dakanirangko kimitbo. Angni ning·o rongtalgipa ka·tongko ong·atbo, O Isol; aro ango kim·kingipa gisikko daktaibo. Nang·ni mikkangoniko angko galatnabe; aro Nang·ni rongtalgipa Gisikko angoniko ra·agnabe. Nang·ni jokatani katchaaniko angna on·pilbo; aro jaksramgipa gisikchi angko rim·chakbo. Unon anga niam pe·giparangna nang·ni ramarangko skigen; aro papirang Nang·ona pilbaatako man·gen . . . O Gitel, Na·a angni ku·chilrangko obo; Unon Nang·ko mitelako angni ku·sik parakatgen. Maina Na·a bolio ka·srokja; ong·ode anga uko on·genchim: Homo Na·a kusi ong·ja. Isolni boliranga bnekgimin gisik ong·a. Bnekgimin aro papna duk man·gipa ka·tongko, O Isol, Na·a chonnikjawa” (Git.51:1-2, 6, 7(b), 8(a), 9-13, 15-17).

Uni nokko riktaina gita Isol baigipa, sronggipa, jongsik  
chalwenggijagipa krongrangko nanga. Uni nokni krongrangna  
ba maljurina ba bilbangrangna nom·gipa be·ninggipa jo·ong  
cha·gimin bolko jakkaljava. Uni ganchirango dangdike on·na  
Isol gonggee re·gipa, skatangko dakarigipa, Jisu Kristona  
an·tangtangko on·kangranggijagiparangko nangja. Ua kamo  
Kristoni chisolchi piokako man·gipa, srongatako man·gipa  
papiarangko, an·chinggita ong·giparangko, Isol jakkala. Uni  
gimin indake gisik pil·ani aro Isolko am·taiani,  
an·tangtangko Isolna on·kanggimin Isolni namnika gita  
ong·bebea, Uoni pattiani nabachongmotgen. Ian mondoliko  
namatpilani kragipa a·bachengani ong·a.

(2) Ia chongipa jakara ku·mongaon gisiksan ong·e  
dongpachina. Ua pil·nipil tom·pae Isolo bi·chakchina.  
A·bachenganio mandeni noko tom·dakchina. Tom·anirango  
an·tangtangan Isolo dilaniko am·china. Mondolitangna  
mol·molchakbo. Basakoba basakoba saoba saksa  
branggipani gisik pil·taianiko man·atna gita bi·chakaniko uni  
bimungko minge Isolo mol·molchakchina. Uamang  
nom·angjachina. Isol uamangni mol·molchakanirangko  
knachakkujana kingking indake dakangchina. Uamang iako  
gisik on·e, bebero·anio dakangode Isol knachakchongmotgen.  
Wachikarini mikka sokbachongmotna sienga ine sakkiko  
on·soani gita Isol skang uamangna mikka warittakaniko  
on·chenggen, aro uamang nom·angjaode bon·kamao Isol  
salgini kelkirangko oe uamangni kosako pattianirangko  
suake rudapgen.

(3) Gilja ka·anirango nama katta chongmotko skibo, aganprakbo. Isolo bebera·jaode, Jisu Kristochi Isol baksa nangrimjaode, gisik pil·jaode mande gimagniona re·angenga ine tale aganprakbo. Isolo bebera·gipana Isol baksa jringjrotna janggiko ku·rachakaha, aro ua rokom janggiko Uni saksa kamkam depante Jisu Kristoo man·a aro Uosan man·a, aro ia jringjrotni janggi da·o ia a·gilsako tangmitingo a·bachenggen ine skibo. Ia a·gilsako tangmitingo mande Isolni namnikako dakode, uni ka·tong namen tom·tombatgen aro katchabatgen ine ia jakara an·tangan Isolni namnikako dake mesokchina aro ua bebeko skibo. Jisu Kristo aganaha, “Angko Watatgipa ang’ baksa gnan. Ua angko saksan watkuja; maina anga pangnan Uni namnikgnirangko daka” (Johon 8:29). Uandakeba Isolni namnikako dake Isolni dongpaako an·ching man·para.

Isolni tom·tomaniko man·gipa papni balko ra·anganioni jakgitel ong·bagipa ong·a. Uni gimin uo kenani gri. Papara mandeko bichalna aro sasti man·gnini gimin kengokgipa ka·pong ong·ata, indiba Kristoni toromara mandeni kengokani a·selrangko gimaatani gimin uo ka·donggipa ong·ata ine aganprakbo. “Darangba rikjaoba denggugipa kata” (Toe Ski.28:1). Pil·e, “Na·a chu·sokgipa tom·tomaο uko rakkigen, jeni gisik nang·o pangchaka, maina Ua nang·o ka·dongaha” (Isaia 26:3).

Ia a·gilsako mandeni janggi tangani dikdiksaan ong·aia, simano janggi tangani rokom jringjrotni rokom

ong·a, maina mandeni janggi guangni gita ba tampini gita  
ong·ja - - jringjrotnigipa ong·a. Isolni ka·saako, Uni  
ka·sachakaniko, Uni Pagipa ong·aniko aro salaramoni  
saliramona chel·grika gita Isol Uni ka·sachakani kri gisik  
pil·giparangni paprangko kema ka·e paprangko wate  
chel·ataniko - - indake Nama kattako skiprake gisik  
pil·aniona menderangko ka·sachakbeanio okambo.

Ia kamo Isolni Gisikni dilani kri dakbo. Iako  
dakmitingo Isolni pattianiko bi·anichi pangnan am·bo.  
Namgipa biteko man·a skode, namgipa bitchriko satna  
nanga, chongmotan Isolni Nama Katta. Ua bitchrini  
chabaani aro dal·rorobaataniara Isolni pattiani kri ong·a.  
Isol mikka waate uko pattigen.

(4) Unikoa ja·kusako mikkangchi re·kubo.  
Mondolini pilak memborrangko tom·chimongatbo. Apsan  
tom·chimonge Isolo bi·china, maikai Isol ka·tongrangko  
sandigen, aro, saniba ka·tongo namgija gnangode uko  
maikai mesokgen; aro uandake dongode, uamang  
ku·rachakchina aro Isolni aro onia ka·ako man·gipani kema  
ka·aniko bi·na, namgijako namatpilna aro bebegija dake  
ra·giminko on·pilna uamang, maikai an·tangtangni bil  
amadipat krenggen, uandake uamangko dakchakbo.  
Namgijako Isolna ba sakgipinna kurachake kema ka·ako  
bi·ani gimin aro namgijako bil ama dipet namatpilani gimin  
ba on·pilani gimin sakanti uamangni ka·tongrango Isolni  
Gisik uamangko didiata gitan jekoba dakchina. Uandake

mondolini memberrang an·sengatpilani aro an·saoatpilaniko  
man·gni ramao re·taignok.

Indake mongsongsranggiparango neng·beaniko  
dakna Isolni Gisik dabioba, Isol uko chu·sokatsrangna  
bilko on·bebegen. Matchako kasi wa·tokchi gobo ine Isol  
nang·o ba ango dabijawa, indiba Uni dabiani kri nang·na  
aro angna bilko on·gen, aro Ua kragipa ostrorango jako  
on·gen. Ampilgijanirango Isol pilakoba mamungsaloba  
dabijawa.

(5) Gisik pil·taienba Isol baksa nangrimtaigiparang  
mondolio tusie aratgiparango mikrakatna krengchina.  
Uamangna Isolni de·mesaatani, Uni ka·sae okampilaniko  
uamangni nachilrango aro ka·tongrangoba pilnipil knaatbo,  
uamangna dondikgija Isolo bi·chakpabo.

Indine Isol uamangko okampilenga ine aganprakbo:  
“Imo, an·ching chanchigrikna hai, ine Jihova agana;  
na·simangni paprang gitchaksranggipa gita ong·oba  
uarang suuri gita bokgen; uarang an·chini rong gita  
gitchakoba, uarang mesni kimilgita ong·gen . . . Jihovako  
man·na ammitingo, na·simang Uko am·bo; Uni sepango  
dongpition na·simang Uo bi·bo; ekanggipa an·tangni rama  
re·aniko, aro kakketgijagipa mande an·tangni  
chanchianirango watgalchina; aro ua Jihovaona  
pil·bachina; aro Ua una ka·sachakgen; aro an·chingni Isolna  
maina Uan bang·bee kema ka·gen” (Isaia 1:18; 55:6,7).

Indine skie uamangna Isolni ka·sabeaniko parakatbo: “Re·babo, aro an·ching Jihovaona an·pilna hai; maina Uan chitdrakaha, aro Uan an·chingko an·sengatgen; Uan dokaha aro Uan an·chingko kagopgen. Hai an·ching uina, an·ching Jihovako uina ja·rikna hai; Uni ong·kataniara pring gitan ong·chongmotgipa ong·a; aro Uan an·chingona mikka gita re·bagen, a·ako sosiategipa ja·mangipa mikka gita” (Hosea 6:1-3).

Jisu Kristoosan an·ching neng·takatako man·gen ine indine skibo: “Pilak gamgipa aro baljrimgiparang Angona re·babo, Anga na·simangko neng·takatgen. Angni pakripeko an·tangtangni gitoko gatbo aro ango skibo; maina Anga sontol aro gisiko ongipa; unon na·simang an·tangtangni janggina neng·takatako man·gen. Maina Angni pakripe saja, aro Angni bal ritchenga” (Mati 11:28-30).

Uamang an·tangtangan Jisu Kristoona ka·tongni do·gako ona nanga. Pap uko rake tekchangnaba gnang, indiba uko oatako uamang nangnikode, uko oatna gita Isol uamangna bilko on·gen. Uibo uijabo Kristo uamangni ka·tongni do·gacholo chadengenga. Ua ning·ona napna doktikenga. Uamang ua do·gako, rake tekgimin do·gako ogenma ? aro Kristoko uamangni ka·tongrangona napna on·genma ? maikai ua uamangni ning·o donggipa pilak sogiminrangko aro jabolrangko galsrange uamangko rongtalatna man·gen, maikai uamang paptangni gimin kratchapile gisik pil·on indine git ring·pana man·gen,



**"O Jisu, Chadenggipa,  
Ang' ka-tong' apalo,  
Chipchange do-ga' dona,  
Nang-na walo salo;  
Chakchike Na-an senga,  
Doktike dongkua,  
Kratchana ang' nangenga,  
Nang-ko champengkuna.**

**O Jisu Doktikgipa,  
Ang' ka-tong' do-gao,  
Nang' jak matako man-a,  
Bu-a bu-su Nang' skoo:  
O Ka-saa, chakchikgipa,  
Uina ampilgija,  
O pap, champengbegipa,  
Ang' ka-tong' chipchanga.**

**O Jisu Mol-molgipa,  
Ina Na-a ka-sae,  
Angni nang-na siako,  
Da-chonnikbo, dede;  
O Gitel, kratchapile,  
Ku'-chake' da-o bi-a,  
Ang' ka-tong' Nang-na oe,  
Dongkampabo, Na-a".**

**(6) Indaka gisik pil-anini bite nangani aiao inmanani  
ong-a. Indake gisik pil-e Isolona an-piltaichongmotaoni  
gital janggi tanganioni gital janggi tanganiona nambata**

mangsongani aro gital miksongani aro nisan ka·ani nabagen. Indakgipa gisik pil·ani siaoni tanganiona, andalaoni seng·aona batangani ong·a. Gitchamrangko gala, gitalrango napsranga. Gisik pil·chongmotgiparang gitcham manderangoni gital mande ong·aniona re·anggiparang ong·a. Uamang ka·tongrango dingtangatako man·aha, gitchamrangko watgalaha.

“Beben anga na·simangna agana, Angni kattako knae angko watatgipako beberagipan jringjrotni janggiko man·aha . . .siaoni janggiona bataha” (Johon 5:24). “An·ching siaoni janggiona bataha ine an·ching uia, maina an·ching jongadarangna ka·sara. Ka·sagijagipa sianion dongkama” (I Johon 3:14); “Uni gimin saoba Kristoo dongode, ua gital dakgimin ong·a; gitchamrang gimaaha; nibo, uarang gital ong·aha” (2 Kor. 5:17). “Skangode na·simang andala ong·achim, indiba da·o Gitelo seng·a ong·aha. Gitelni namnikara mai, uko chanchie nie seng·ani dedrang gita re·rurabo; maina pilak nama aro torom aro bebeo seng·ani bite gnang; aro andalani bite nanggija kamrang baksa rengsi ong·nabe, batesa uarangko manengbo” (Eph.5:8-11). “Na·simang segimin ma·chong, raja ong·ani kamal, rongtala jat, gamtangna manderang, maikai na·simang andalaoniko an·tangni aiao inmanani seng·aona na·simangko okamgipani namarangko mesokgen. Skango na·simang mande ong·gijagiparang, da·ode Isolni manderang; ka·sachakako man·gijagiparang da·ode ka·sachakako man·aha” (1 Pitor 2:9,10).

“Pilak ku·sia , aro ka·agapa, aro ka·onanga, aro manenggrika, aro kal·staparang, pilak miknengan baksa, na·simangoni chel·atako man·china. Na·simang batesa rinok rinok dakgrikbo, ka·saningbo, aro Kristoo Isol maikai na·simangko wataha, na·simangba uandaken watgrikbo. Uni gimin ka·sara dedrang gita, Isolko ja·rikgiparang ong·bo; aro ka·saon re·rurabo, jedake Kristo an·chingna ka·saaha, aro, similani bibana, an·chingni gimin Isolna an·tangko on·ani aro boli on·aha” (Eph.4:31 - 5:2).

Uamang Kristonin ong·a ine ka·sagrikani chinchime·sokgen, maina Jisu aganaha: Ge·eta gitalko anga na·simangna on·a, na·simang ka·sagrikbo; jedake anga na·simangna ka·saaha, na·simangba ka·sagrikbo. Na·simango ka·sagrika gnangode, uachi pilakan na·simangko angni sninggiparang ine uigen” (Johon 13:34-35).

Kristonirang janggi tanganina gital miksonggni dingtang nisan ka·gniko man·pagiparang ong·a. Uamang an·tangtangna tangjawaha, indiba uamangna Ka·sagipana, uamangko Jokatgipana, uamangna sichakgipanasan tanganggan. “Angna tangara Kristo” ine chong·motgipa kristian katchae ku·rachakgipa ong·a. (Phil.1:21; 2 Kor.5:14,15).

Ia cholonni gital nabaaniara uamang Jisu Kristonin ong·a ine ong·chongmotgipa sakki ong·a. Ian gisik pil·anina

krakra bite nangani ong·a. Ian kni rokanina bate, ganding chindingko dingtang gananina bate, skulo poraianina bate namen batgipa ong·a. Indiba Jisu Kristo an·tangniko iarangko dabia, aro iana bate komibatako Jisu chu·ongnikjawa - - “Na·simang Jihovana ka·sagiparang namgijako mitchibo” (Git.97:10); “Na·simang an·tangtangko papna sigimin, indiba Kristo Jisuo Isolna tanggipa ine chanbo” (Rom. 6:11); “Na·simangni salgio donggipa Paa maikai chu·sokgipa ong·a, na·simangba indaken chu·sokgipa ong·bo” (Mati 5:48). Ian Kristonin ong·bachongmotani ong·a.

Indakgiparang Isolna aro mandeskarangna ka·sae dangdike on·e Isolni kamni gimin pangnan tikkelparang ong·ode, a·gilsakni seng·a, a·ani kari, a·brini kosako Isolni rikgimin songjinma ong·baa. Manderang uamangni nama kamko nike Salgio donggipa an·chingni Paako rasong chaatgen, maina uamangara Isolni gimin janggi tanganio sakki on·pagiparang ong·gen. Uamangara Isolni uamangko jokatanini mangsongako chu·sokatenggiparang ong·enga, uamangara Isolni dedrang ong·bachongmota.

“Isol ka·sara ong·a”. Uni ka·saa tipgijagipa rokom ong·a. Uni ka·sachakaniara jringjrotoni jringjrotona baigipa ong·a. Uo an·ching kenchakani grisrange ka·dongsrangna ama. Isolni ka·sae an·chingni bebera·anina illenggijagipa pangchakani ong·ani gimin , gisik pil·gipani papko Isol

watgen ine an·ching ka·dongsrange aganpraka. Isol an·tangni ka·sachakaniko chu·sokatchongmotgen.

Mondolirang siangengoba, aro uamangni memborrang namgijako dakachi Kristoni chisolni kosako kratchapilaniko ra·baatgiparang ong·oba, uamangna namatpil·ani, pap watani, rongtalatani, an·sengatani aro an·saoataniba donga. Uamang Isolko chonnikgiparang ong·oba, Isolni ka·saaoni aro simsakanioni aro ka·sachakanioni balpake dandakangna amja. Isol Pagipaona re·gni rama cha·chipilgija chong·motgipa gisik pil·ani aro paponi Isolona an·pilani aro Isolni namnikako janggi tangani niam gita ra·gatani ong·a. Pil·bataigni rama donga, uni do·ga oe dongengpiti. Isolni ka·saa indake apala, chua aro tu·a ong·a.

Oe, jensalo manderang Isolni okampilaniko mania, a·gisio Isol chiringrangko naate chibimarangko jokangata, aro a·sal gri biaprango mi aro misirangko chabaata, aro bite gri bolrangko bite nangata gita ong·baani ong·a. Mandearigipani ampilgijaniara Isolni amani ong·a. Oe, Isol suake pattibegipa ong·a. Uni ka·sae nampilatani kamko ka·on, “Bakra aro chigrigipa a·song katchagen; aro a·gisi ka·srokgen, aro golap bibal gita balgen; ua bang·en bibal balgen, aro git ring·e katchagen; uarang Jihovani rasongko an·chingni Isolni nitoako nikgen” (Isaia 35:1-2)

Nang·ni mondolini obostarang mai ? Isolni tom·tomako man·gipa, Gisikni katchaanio man·paaniko

man·gipa ong·engode, Isolko mitelna. Ong·jaode, ia kosako seaniara indakgipa mondolina Isolni pattianichi didiatani aro ka·dongatani ong·china.

Na·simangni mondoli uandake dakna ka·sokode aro uko kakket aro bebe ong·e aro ka·donge mamungkoba donchanggija dakode, pangnaba ong·kugijagipa nok rongtalataniko aro janggi rongtalataniko na·simangni mondoli man·genchim - - indakgipa rongtalatani Isoloni pattianirangna do·garangko oate mondolini gisikni biding bilko tangchapilatani aro man·pilataniara inditan dal·gipa aro bilakgipa ong·genchim, jedakode mondolio uarang gappretpilgenchim. Aroba uan gipin mondolirangonaba joksua kangpilgenchim aro ua gipin mondolirango siangenggipa Isolni wa·alrangko ching·attaiani ong·genchim.

Ia aiao inmanpilgipa katchagnini aro tom·tomgnini ramako anga na·simangna mesoka. Uan ga·nanggipa rama ong·breja. Pap ku·rachakani aro an·tangtangko onnatsrangani rama, kema ka·ani aro on·pilaniko dakani rama, indiba, uan Isolona pil·bagnini rama ong·a. Ua ramako re·na Isol re·gnigipako bilakatbelegen. Ua un baksa re·pagen, Ua dilgen. Da·nomang, da·ken, rechakate aro ua ramako Pagipaona re·bo.

Kristoo jongadarang aro noabirang ia ramako re·bo, unon na·simang Jisu Kristochi Isol baksa nangrimanio Kristianni katchaaniko na·simangni pangnaba aro mamung saloba man·kugijagipa aro uikugijagipako

man·gen aro uigen. Je namarangna, je tom·tomanina, je katchapilanina, ka·tongogipa je ksrokbeanina na·a kapakoba man·jaenga, je kenmansranggijaniko Isol baksa kim·kim be·atna amgija nangrimaniko na·a am·beoba man·kuja, uarang pilakkon man·a jensalo Isolni namnikana skatangrangko bamatsrange Kristoni ramako Kristoo baksa re·paa. Uan chijimgipa aro an·senggijagipa aro chaktogijagipa seengan gapgipa biaponi sal nanggipa aro an·senggipa biapona an·sengbaljokani biapona re·baskaani gita ong·gen. Na·a janggiko man·gipa ong·aijawa, bate na·a Kristo Jisuo janggiko chu·soke man·gipa ong·para. (Johon 10:10)

Ku·rachakkugijagipa pap, gisik pil·kugijagipa pap, aro papni gimin kema ka·aniko man·kugijagipa, iarangan ritchani ritcha Kristianrangni janggi tanganini katchaani aro tom·tomaniko ra·sekanga. Uamango papko ku·rachakanichi aro kema ka·ako man·anichi aro on·pilaniko dakanichi uamangoniko papni baljrimako jitpake galani pal uarangara pilak somoion uamangna jrimgipa papni balko gate tom·tom ong·ja, ka·srokna aro katchana chu·soke man·ja. Ia papni nokkol itaoniko Jisu Kristo jakgitelatgipa ong·bebea. Uni gimin

“Pilak jrimako aro duule rim·ninggipa papko galangenba, an·chingna donsogimin daarianiko chakchike daarina hai; bebera·ani nokgipa aro chu·sokatgipa Jisuko miksonge” (Ibri. 12:1,2).

Papko galram donga. Uan Chisol ong·a. Bal  
jrimgipana neng·takramba dong·a. Uan Jisu Kristoan.  
Toromna okkribegipana okkatgipa, gisikni janggiko  
on·atgipa, ka·tongo katchaaniko naatgipa, andalao  
seng·atgipa, tom·tomatgipa pilakan Jisuan.

“Jisu agana indine  
    “Angona re·babo,  
Neng·takbo, O bal jrimgipa,  
    Ang’ ka·bako dongbo.”  
Jisuona re·baoa,  
    Papi, neng·beoba,  
Uo anga neng·takengon,  
    Katchapilsrangaha.

Jisu agana indine,  
    “Anga indin on·a,  
Janggini Chi’, nangbegipa,  
    Ringe tangbo, na·a”  
Uo chiko ringeo,  
    Janggiko man·aha,  
Okkaa man·e an·saopila,  
    Jisuo tangenga.

Jisu agana indine,  
    “Seng·ani gnang Angon;  
Angko nion sal nabagen  
    Ka·tong’ andalaon.”



Jisuko anga nioa,  
Ango sal nabaaha,  
Un' seng·ao jringring re·gen,  
Seng·atgipa baksa.”

## KRISTO BAKSA MONDOLINI NANGRIMANI

Pagipa an·chingko andalani biloniko jokataha, aro Uni ka·saani Depanteni songnoko dongskaaha; jeo an·ching piokako, paprangko watako, man·a. Uan nikgija Isolni bimang, pilak dakgiminoni dejakra ong·a; maina salgio aro a·ani kosako donggiparang, pilakkon uano dakaha; uachin aro uana pilakkon dakaha; aro ua pilakna skang ong·a, aro uo pilak nangrime donga. Aro ua be·eni, chongmotan mondolini, skotong ong·a. (Kol.1:12-18).

Jedake be·en ge·sao an·chingni be·en bakrang bang·a gnang, aro pilak be·enni bakrangni kam mingsan ong·ja; uandake an·ching bang·gipa Kristoo be·en ge·san ong·a, aro sakprakprakan saksasakgipinni be·eni bakrang ong·a. (Rom.12:4-5). Bak sa duk man·ode, pilak bakrang un baksa duk man·para; ba baksa rasong man·ode, pilak bakrang un baksa katchapara. (Rom.12:3-16).

Kristoba mondolina ka·saaha, aro uani gimin an·tangko on·aha; ua maikai, simteka aro sicheparang ba indakgiparang donggija, torom aro matnanga gri ong·china, rongchinge mondoliko an·tangan an·tangni mikkango donna man·na gita, uko kattao chichi auatachi ronggalatenba torom ong·atna man·gen. (Eph.5:23-27).





*Na·a nangni Mondolini namgniko man·atna  
ka·pakgipa ong·bebeode, ia ki·tap bi·sako  
poraiepabone. Ong·jaode da·porai, nang·ni  
somoiko re·atanisan ong·aigenchim. Sakgipinna  
poraina ka·sapae on·pabone.*

Published by -  Tura Book Room, Tura and  
Printed at - Panthi Offset Printers, Sukbir Bhawan, Tura.  
(Reprinted - 2003)